


國朝耆獻類徵初編卷之五目錄

宰輔五

李之芳



國朝耆獻類徵初編卷之五

通奉大夫前署江西巡撫江西布政使司布政使湘陰李桓輯
宰輔五

李之芳

李之芳山東武定人順治四年進士授金華府推官十一年以卓
異內升刑部主事遷本部員外郎郎中十五年九月授廣西道御
史十一月疏言各省錢糧定例官收官解乃各州縣私僉大戶承
直民間畏懼如赴湯蹈火百計營脫官吏黷貨免此僉彼鄉愚不
諸倩人頂充因有棍徒包攬將在官銀米任意花銷仍累原僉里
戶賠償小民膏血有限不堪一剝再削雖加笞箠終無所得故各

省侵欠錢糧爲數甚多追補還官者十常不得一二總緣陋規相
仍名色不一有司視爲故常耳苟且欺蒙將何底止乞 敕各撫
按力行整頓察革陋規凡州縣徵收銀米槩令佐貳官彙解遇有
借端科索者許佐貳官揭報州縣州縣轉報撫按提問治罪揭報
之佐貳官酌加獎勵如撫按釐剔無效州縣奉行不力並嚴議處
分疏入得 旨私僉民解病民殊甚下部議如所請行又言州縣
路當孔道迎送往來自朝至暮有曠官守請飭禁從之十六年六
月疏劾兩廣總督李棲鳳以失守城池革職道員郭光祖委署左
江道以徇私獲罪之革職推官季奕聲復原任應察議 上命棲
鳳回奏自以不能詳察引咎下部議處如例十七年巡按山西十

八年 聖祖仁皇帝御極裁巡按回原任康熙元年請假歸二年
八月補湖廣道御史三年十二月疏言邇來叩 闕事情干涉民
間冤抑者固自不乏然而健訟刁告之輩砌款行私降級革職之
官飾詞巧辯滋煩擾而長欺妄莫此爲甚嗣後審問情虛宜各依
律究擬勿止以責贖從輕發落其審虛復行叩 闕仍審虛者加
等治罪庶刁誑息而體統肅疏下部議行五年巡視浙江鹽政七
年掌京畿道事尋掌河南道事八年五月內大臣鼐拜獲罪拘禁
大學士班布爾善以結黨行私伏誅之芳疏言近者班布爾善任
意票擬已置大法自此政本肅然一清矣臣惟票擬爲政本所繫
昔時大學士等俱內直諸司章奏卽日票擬 世祖章皇帝面賜

裁決立法至善自順治十八年以後惟輔政大臣內直大學士等
在外疏奏俱至次日看詳及進呈候 旨止有學士而大學士不
預非所以昭嚴密請仍復舊例內直看詳卽日票擬公同候 旨
永杜任意更改之弊疏下部從之又疏言 世祖章皇帝時賞罰
出於至公其時之督撫不敢恣睢無忌率有司以虐窮民然猶不
時甄別處分以防其壞法害政之漸輕則降革重則提拏斧鉞懍
然未嘗少貸故當時吏治肅清民生不困豈一時之督撫皆賢彼
誠有所畏也自順治十八年以後督撫率多夤緣而得有所恃以
無恐勒索屬員擾害百姓以下僚爲奴隸任傳宣爲爪牙橫取財
物賄賂權奸根深蒂固惟其意所欲爲夫直省億萬之眾皆 世

祖章皇帝畱遺之羣黎皆我 皇上愛養之赤子其能堪此輩腴
削爲也自與受同罪之法嚴無敢糾督撫之貪婪者與者不認則
言者涉虛卽確然有據亦不能執其人而問之矣豈但不能糾督
撫且不敢糾司道守令糾之則干礙督撫安有督撫承問而不力
爲脫卸謂盡屬子虛者數年來未嘗因貪縱而重處一人反得粉
飾功次冒濫加銜有貪之利無貪之害彼又何憚而不怙惡以自
恣耶近者 皇上親政屢 頒諭嚴飭亦不過糾一二有司以謝
責夫表不正則影不直安足除貪盜風而甦民生乎乞 睿鑒親
裁罷黜溺職督撫庶吏治漸有起色疏下部知之尋 甄別各省
督撫罷黜降用休致數人九年五月疏劾大學士魏裔介前以候

補左都御史妄援 恩詔廕其子魏嘉及入內院市恩徇私諸款
詔裔介回奏仍下部察議以各款俱辯釋惟候補官無得廕之
例革魏嘉廕生事詳魏裔介傳八月得 旨內升以四品頂帶食
俸仍任御史十一年二月擢左副都御史六月疏言外官失察衙
役犯贓例坐革職任內部院司官所管胥役犯贓向未有失察處
分故縱容奸蠹置若罔聞請 敕部嚴議俾知懲警又疏言今日
吏治之弊在於文法太密而尤密者在於方面有司等官常有在
任三兩年而罰俸至二三十年者夫俸薄尙恐不足以養廉况積
年無俸又安能責其潔己愛民乞 敕部酌覈外官罰俸事由原
無情弊近來處分過當者請 旨仍遵 世祖章皇帝時定例除

去繁苛以課吏治之實效又疏言兩淮兩浙長蘆河東等處鹽課專遣御史經理爲商人培一時之元氣卽爲朝廷保恆足之泉源至於緝梟販以疏官引嚴秤掣以速行銷翦惡棍以安良善察職要以便小民皆巡鹽御史職掌在順治十八年以前原以此爲殿最之法不僅以完課爲能事乞 敕嗣後各巡鹽期滿仍行昔日考覈之例戶部據錢糧之完欠爲高下都察院據政績之優劣爲勸懲庶各爭自濯磨克盡職掌矣疏並下所司議行是月浙江巡鹽御史杭奇常錫允以私派詐贓爲商人赴通政司控告命之芳赴浙察審得實杭奇常錫允並論絞十月遷吏部右侍郎十二年六月授浙江總督明年三月疏言逆藩吳三桂陷湖南恐煽誘

滋擾浙江提督標兵應復前未裁減時原額令各營使用槍礮爲
攻堅擊遠計疏甫入逆藩耿精忠執福建總督范承謨據福州反
之芳聞變疏言賊兵已至浦城衢屬仙霞關與賊接境而常山一
縣又爲西南孔道臣已分調官兵星馳守禦請急 敕江南省調
兵赴援江西省調兵謹守玉山鉛山要路以固封疆疏入 命都
統賴塔率江甯副都統瑪哈達瑚圖等及駐防兵赴浙江 諭令
與之芳商決軍務五月奉 詔進駐衢州請復降調總兵李榮原
官俾統領綠營副將王廷梅牟大寅陳世凱鮑虎等分道禦賊賊
由常山陷開化壽昌淳安由處州犯義烏浦江東陽湯溪龍遊沿
河阻絕餉道聯結叛弁司定猷叛鎮祖宏勳陷平陽踞温州又陷

黃巖犯台州及紹興集悍卒數萬窺衢州七月之芳與賴塔閱兵
於水亭門率總兵李榮及副都統瑚圖等兵直薄賊壘軍於皖西
賊悉眾來犯我兵衝冒礮矢奮擊卻賊賊越壕踞木城我兵追擊
至壕守備梁安歿於陣賊乘夜移踞杜澤大洲陳世凱與副都統
沃申進勦斬戮甚眾乘勝復義烏湯溪牟大寅破賊常山遊擊王
世萬破賊龍遊鮑虎復壽昌王廷梅敗賊於金華之石梁大溝源
李榮復東陽尋大敗賊兵於金華之壽溪斬僞總兵張元兆等毀
寨十八參將洪起元敗賊於紹興復嵊縣先後得 旨嘉之芳調
度有方將士奮勇令事平日議敘時大將軍康親王傑書自京統
師至金華分遣貝子傅拉塔與都統巴雅爾等勦賊溫台賊之在

處州者逼衢州東南在江山者逼衢州西南之芳分飭營伍嚴守禦勿遽迎擊十月疏言臣自駐衢以來率勵將士搜剿雖所至克捷終因兵少戰守不能兼應原調集之兵及新設援剿鎮兵共只數千金華堵禦溫處兩路嚴州接連徽饒二郡並屬咽喉之地而衢州又當衝扼要爲全浙門戶各處賊兵皆報稱數萬每處官兵不及三千派防屬縣駐守府城聞警策應常恐不敷臣標見設三營應增足每營二千之數並增設前後二營合成五千兵目前便於策應有恢復之地即可分撥駐守俟事平之日調作溫處各營原額是增兵不踰經制之外而援剿機宜克協矣疏下戶兵二部議行會康親王奏進征溫處應設溫州黃巖平陽三鎮標營其將

并聽之芳揀補陳世凱王廷梅鮑虎並擢總兵官十一月賊眾五萬由常山逼衢州城西溝溪倚山結十數寨掘壕塹覬聯南路賊巢之芳與賴塔議出賊不意遣王廷梅同參領禪布等夜趨溝溪分隊進攻自辰至酉合力撲斬賊萬餘賊將棄寨潰竄追逐二十里獲巨礮器械甚多十四年二月疏言臣統師衢郡日夕對壘凡籌畫戰守接濟芻糧策應調遣時刻勿違軍機緊要之事萬不能輟更無暇晷鞠理盜案且臬司駐劄省會解審既慮疏虞覈駁又恐遲滯乞 敕歸撫臣就近覆審徑行題結又疏言凡城鄉盜案專汛兼轄武職有住俸罰俸降級之例所以責其督緝逸盜也今用兵之際或本汛防剿或調遣隨征業已披堅執銳展績封疆

不能分身緝盜俸銀停支情屬堪憫宜破格開復以示 恩養將士之心又疏言金衢台嚴紹等處賊寇屢經征剿附從烏合之徒漸已解散仍復故業臣飭所在官吏安集撫綏俾投誠眾多惟賊寇蹂躪之地一望蕭條號號載路卽如衢州近城難民見有九千七百餘口其散處各鄉者尙不可數計臣與府縣官雖捐貲量給要不過涓滴之微請於布政司所收捐助軍需內動支散給諸疏下部議並從之時賊帥馬九玉朱懷德等盤踞江山常山開化三縣於溪口清湖大溪灘茅村東南列賊營四又列營前嶺以聯絡東南各賊巢且散布處州金華山谷四出窺犯李榮陳世凱王廷梅等分路搜剿所至大捷五月之芳與賴塔議乘連旬大雨河水

泛漲由南塘擣賊前嶺陣斬七百餘級墜崖落水死者無算十五年三月遣將由遂安截賊後路連破賊寨復開化縣疏言衢州控賊要害滿漢官兵擐甲枕戈已逾二年因浙省處處用兵分布各路以致兵力不敷前此專望一處埽平便可併力攻取直擣仙霞不意各路寇氛雖屢經剿創尚未撲滅江西廣信各逆又出沒常山開化欲與馬九玉賊營聯合在衢州滿漢官兵僅能堵禦若欲急圖滅賊非厚集兵力不可目下賊勢斷不能窺犯江南宜酌調松江崇明提標兵五六千赴浙聽大將軍康親王調度并力進剿疏入 上命康親王於浙省分駐兵酌調統率 諭之芳議定由何路進剿之芳疏言自耿精忠叛變分遣賊眾一由衢州一由溫

州一由處州三路入犯兼以海洋賊舟往來牽制而且廣布僞劄
煽惑人心不逞之徒所在蜂起官兵各路堵禦屢奏捷功而負固
抗逆者尚有温州之曾養性祖宏勳處州之連登雲徐尙朝沿海
出沒之熊進學等因衢州向爲入閩大路勁卒畢集今必先由衢
州進擊殲其精銳則諸路之賊自然瓦解逆賊馬九玉朱懷德等
見在深溝高壘死守河西然其南則江山西則常山皆可以間道
截其糧運斷其歸路我兵一進使賊首尾受敵勢難仍保巢穴從
此八閩可奏蕩平矣疏入 從之八月康親王抵衢州與之芳及
賴塔議先斷賊餉道以奪河西賊勢遂進兵大溪灘復江山縣馬
九玉棄營遁之芳遣副將馬化龍參將閻進趙得壽率兵隨賴塔